



Broj: 01/1-02-1762/18  
Breza, 25.07.2018. godine

## ZAPISNIK

**Sa DVADESETE REDOVNE SJEDNICE Općinskog vijeća održane dana 27.06.2018. godine sa početkom u 16,30 sati u prostorijama Općine Breza-Sala Općinskog vijeća.**

Sjednicom je predsjedavao predsjedavajući Općinskog vijeća Jusić Vedad.

Po izvršenoj prozivci konstatovano je da sjednici Općinskog vijeća prisustvuje 18 vijećnika.

Opravdano odsutni vijećnici Avdić Edin i Sokić Dževahid, a vijećnik Zaimović Anes najavio je kašnjenje na sjednicu.

Osim vijećnika sjednici Općinskog vijeća su prisustvovali: Općinski načelnik Munib Zaimović, pomoćnici Općinskog načelnika: Smajila Omerhodžić, Meliha Beširević, Salih Hasanspahić, predstavnici etičkog odbora, predstavnik Radio Breze.

Predsjedavajući Općinskog vijeća Jusić Vedad upoznao je vijećnike da je došlo do tehničkih problema prilikom slanja materijala za sjednicu, obzirom da je dio materijala stigao pred samu sjednicu, te je vijećnicima uputio izvinjenje.

Zatim se prešlo na razmatranje Zapisnika sa 19. redovne sjednice Općinskog vijeća Breza.

Primjedbi na Zapisnik nije bilo, te je nakon glasanja konstatovano da je isti usvojen jednoglasno sa 18 glasova ZA.

Zatim se prešlo na odgovore na vijećnička pitanja.

Vijećnik Bajrić Fetah ponovo je istakao da nije dobio odgovor na postavljeno vijećničko pitanje koje se odnosi na isplatu poljoprivrednog podsticaja.

Predsjedavajući općinskog vijeća zatražio je od općinskog načelnika i općinskih službi da na vrijeme odgovore na postavljena vijećnička pitanja.

Općinski načelnik obećao je da će informacija o isplati podsticaja biti objavljena na zvaničnoj stranici općine.

Vijećnica Selma Beširević također nije zadovoljna odgovorom nadležne službe po pitanju rješavanja problema koji građani imaju sa divljim svinjama. Traži konkretan odgovor, može li se, hoće li se i kada će se riješiti problem?

Vijećnica Nejira Bulbulušić-Muratović tražila je dopunu odgovora koji se odnosi na rušenje vatrogasnog Doma. Da li općinsko vijeće ima određenu dokumentaciju, te gdje je završio građevinski materijal od objekta. Isto tako traži konkretan odgovor na postavljeno pitanje koje se odnosi na centralno spomen obilježje, kad je započeto i zašto nije završeno od strane tadašnje vlasti?

Vijećnik Sirotanović Arif prokomentarisao je odgovor koji se odnosi na filtersko postrojenje te predlaže da se ulože naponi da se ovo filtersko postrojenje stavi u funkciju i da se jednom ovaj problem riješi i da građani Breze imaju ispravnu vodu. Također je prokomentarisao rušenje vatrogasnog doma te koliko je njemu poznato isti je srušen te je

naknadno obezbjeđena potrebna dokumentacija za rušenje istog iako je zgrada bila u odličnom stanju sa manjim oštećenjima.

Pomoćnik općinskog načelnika Beširević Meliha istakla je da, što se tiče objavljivanja imena o dobivenom podsticaju na zvaničnoj web-stranici, moraju voditi računa o zaštiti ličnih podataka.

Zatim se prešlo na postavljanje novih vijećničkih pitanja.

Vijećnica Jekalović Amina u pismenoj formi, postavila je vijećnička pitanja koja se odnose na rješavanje problema u naselju Menjaci-Župča gdje su na putu otuđene slivne rešetke i ovo pitanje je već jednom postavila.

Drugo pitanje se odnosi na isplatu studentskih stipendija za nadarene studente, gdje je planiran iznos od 15.000KM a po saznanjima da su stipendije dobili samo učenici generacije.

Treće pitanje se odnosi na isplatu naknade predsjednicima mjesnih zajednica, gdje je u Budžetu planiran iznos od 8.400KM, međutim još ništa nije isplaćeno.

Vijećnik Kadrić Memsud postavio je pitanje koje se odnosi na zdravstveno stanje životinja u općini Breza, te dokle je došla izgradnja spomen obilježija u mjesnim zajednicama, te kada će započeti izgradnju spomen obilježja u Župči. Isto tako predlaže da se pronađu sredstva za ograđivanje kontejnera za odlaganje otpada.

Vijećnik Sirotanović Arif postavio je pitanje ko je nadzorno lice kod sanacije klizišta u naselju Opreč, ko vrši nadzor nad izvođenju radova te ko izvodi radove na putu Slivno-Orahovo. Isto tako predlaže da se poveća broj kontejnera u naselju Slivno. Pokrenuo je inicijativu da se uspostavi saradnja sa lokalnom zajednicom Požega Srbija na kulturnom i sportskom nivou.

Predsjedavajući općinskog vijeća, također je pokrenuo inicijativu o postavljanju ležećih policajaca u naseljima 6.April i Banjevac.

Vijećničkih pitanja više nije bilo te je nakon glasanja konstatovano da je jednoglasno sa 17 glasova ZA usvojen sljedeći:

## **D N E V N I R E D**

1. Informacija o aktivnostima općinskog načelnika između dvije sjednice.
2. Razmatranje i usvajanje prijedloga Odluke o izmjeni i dopuni Odluke o kriterijima i postupku ostvarivanja prava iz oblasti socijalne zaštite porodica sa djecom i podsticanja nataliteta i prava na novčanu i drugu materijalnu pomoć pod povoljnijim uslovima na području Općine Breza.
3. Razmatranje i usvajanje prijedloga Odluke o pristupanju izradi regulacionog plana resort/ turističkog naselja Vijesolići-Breza.
4. Razmatranje i usvajanje prijedloga Odluke o pristupanju izradi regulacionog plana resort/turističkog naselja Erići I.
5. Razmatranje i usvajanje prijedloga Odluke o pristupanju izradi regulacionog plana za resort/turistička naselja Erići
6. Razmatranje i usvajanje prijedloga Odluke o organizaciji privredne i kulturno-sportske manifestacije „Bazenijada 2018.“
7. Razmatranje i usvajanje Izvještaja o radu Javnih ustanova sa finansijskim izvještajem za 2017.godinu i izvještaja o radu Upravnih odbora javnih ustanova
  - a) JU „Centar za socijalni rad“ Breza
  - b) JU Za predškolsko obrazovanje i vaspitanje „Umihana Čuvidina“ Breza
  - c) JU Opća biblioteka „Muhamed Kantardžić“ Breza
  - d) JU Dom zdravlja Breza

8. Razmatranje Informacije o realizaciji projekta Proširenja sistema vodosnabdijevanja naselja „Bukovik“.
9. Presentacija idejnog rješenja gradske tržnice.
10. Razmatranje i usvajanje prijedloga Rješenja o konačnom imenovanju članova Upravnog odbora JU Dom zdravlja Breza.
11. Imenovanje radne grupe po Zaključku Općinskog vijeća („Sl. glasnik Općine Breza broj 06/18“).
12. Upoznavanje sa dopisima upućenih Općinskom vijeću.

#### **Ad.1**

Informacija o aktivnostima općinskog načelnika između dvije sjednice.

Općinski načelnik upoznao je vijećnike da su u periodu između dvije sjednice vođene sljedeće aktivnosti :

- Strategija razvoja općine za period do 2028.godine u završnoj je fazi.
- Završena je sistematizacija radnih mjesta te se trenutno nalazi kod predstavnika sindikata na davanju saglasnosti.
- Usvojen je prostorni plan i u toku je donošenje prostorno – planske dokumentacije predviđene prostornim planom.
- Kada je u pitanju harmonizacija ostalo je da se završe još dvije katastarske općine.
- Otvoren je izgrađeni i obnovljeni most na rijeci Stavnji u 6.aprilu te je ostalo da se asfaltira dio puta od mosta do pruge.
- Sanacija klizišta na Opreču je u toku
- Radovi na putu Liješće- uveden izvođač
- Korito rijeke Stavnje – izvršeno čišćenje
- Klizište Kolonije je sanirano
- Trotoar od o.š. do stare džamije u Mahali obezbijedeno finansiranje
- Vode se aktivnosti na uređenju parking prostora u donjem zanatskom centru
- Za izgradnju dječijeg igrališta raspisan tender
- Izgradnja kanalizacije „Jasike“ u završnoj fazi
- Izrada saobraćajnog projekta, također u završnoj fazi gdje će se postavljati saobraćajni znakovi i ležeći policajci
- Vodovod Slivno- obezbijeden dio sredstava za izgradnju rezervoara na Crnom vrhu
- Nastavljene aktivnosti na izgradnji vodovoda u Bukoviku
- Biće započeto uređenje Šehitluka II, a u toku je dobivanje građevinske dokumentacije za centralno spomen obilježje
- 01.07. biće postavljen kamen temeljac za izgradnju tržnog centra a u toku je i izrada projektne dokumentacije za izgradnju tržnice
- Biće započeto utopljanje obdaništa i osnovne škole u Župči
- U toku je imenovanje radne grupe za određivanje lokacije na reciklažno dvorište

#### **Ad 2.**

Razmatranje i usvajanje prijedloga Odluke o izmjeni i dopuni Odluke o kriterijima i postupku ostvarivanja prava iz oblasti socijalne zaštite porodica sa djecom i podsticanja nataliteta i prava na novčanu i drugu materijalnu pomoć pod povoljnijim uslovima na području Općine Breza.

Bez učesnika u raspravi jednoglasno sa 18 glasova ZA usvojena je Odluka o izmjeni i dopuni Odluke o kriterijima i postupku ostvarivanja prava iz oblasti socijalne zaštite porodica sa djecom i podsticanja nataliteta i prava na novčanu i drugu materijalnu pomoć pod povoljnijim uslovima na području Općine Breza.

(U trenutku glasanja u Sali nije bio prisutan vijećnik Arif Sirotanović)

### **Ad.3**

Razmatranje i usvajanje prijedloga Odluke o pristupanju izradi regulacionog plana resort/ turističkog naselja Vijesolići-Breza.

Pomoćnik općinskog načelnika Smajila Omerhodžić pojasnila je da su Odlukom o provođenju izmjena i dopuna Prostornog plana općine Breza za period do 2029., članom 50., stav (3) utvrđeni lokaliteti za izgradnju turističkih/resort naselja, a između ostalih i lokalitet Vijesolići u površini od 12,17 ha.

Istim članom, a stavovima (4 i 5), koji glase:

„Osnovni preduslov za realizaciju izgradnje na područjima resort naselja je izrada i usvajanje detaljne provedbene dokumentacije.

„Za sva resort naselja je utvrđen režim gradnje I stepena, te je nužno za sva resort naselja izraditi i usvojiti regulacione planove, u skladu sa osnovnim propozicijama i urbanističko – tehničkim uslovima koji su dati ovim planskim dokumentom“.

je utvrđena obaveza donošenja provedbene planske dokumentacije.

Shodno navedenom, a na osnovu pisma namjere investitora Murooj d.o.o. Sarajevo, Služba predlaže donošenje predložene Odluke.

Nakon datog pojašnjenja predložena Odluka usvojena je jednoglasno sa 19 glasova ZA.

### **Ad.4**

Razmatranje i usvajanje prijedloga Odluke o pristupanju izradi regulacionog plana resort/turističkog naselja Erići I.

Također bez učesnika u raspravi jednoglasno sa 19 glasova ZA usvojena je Odluka o pristupanju izradi regulacionog plana resort/turističkog naselja Erići I.

### **Ad.5**

Razmatranje i usvajanje prijedloga Odluke o pristupanju izradi regulacionog plana za resort/turistička naselja Erići .

Bez učesnika u raspravi jednoglasno sa 19 glasova ZA usvojena je Odluka o pristupanju izradi regulacionog plana za resort/turistička naselja Erići.

### **Ad.6**

Razmatranje i usvajanje prijedloga Odluke o organizaciji privredne i kulturno-sportske manifestacije „Bazenijada 2018.“

Vijećnik Kadrić Memsud predlaže organizatorima da se prilikom organizacije kao prostor iskoristi sportska sala u izgradnji, te da se pozovu izlagači susjednih općina da izlože svoje proizvode.

Vijećnik Bajrić Fetah je protiv predložene lokacije za održavanje ove manifestacije.

Vijećnica Jekalović Amina u ime klubova SDP i DF podržava organizaciju ovogodišnje Bazenijade 2018. uz uslov da se ispune osnovni higijenski i ostali potrebni uslovi za organizovanje manifestacije.

Vijećnik Arif Sirotanović predlaže da se u program ovogodišnje Bazenijade predvidi više sportskih i kulturnih sadržaja.

Nakon toga proveden je postupak glasanja, te je konstatovano da je sa 17 glasova ZA, 1 glasom protiv i 1 suzdržanim usvojena Odluka o organizaciji privredne i kulturno-sportske manifestacije „Bazenijada 2018.“

Na prijedlog vijećnika uslijedila je pauza od (17:35 do 18.00 sati).

#### Ad.7

Razmatranje i usvajanje Izvještaja o radu Javnih ustanova sa finansijskim izvještajem za 2017.godinu i izvještaja o radu Upravnih odbora javnih ustanova.

a) JU „Centar za socijalni rad“ Breza.

Direktor JU „Centar za socijalni rad“ Breza Osman Salkić upoznao je vijećnike da izvještajni period obuhvata i vrijeme u kojem on nije bio direktor, te su preuzeti postojeći podaci. Istakao je da su kroz izvještaj prikazane sve aktivnosti koje su urađene.

Predsjednik UO JU Centar za socijalni rad Breza Omerhodžić Rešad također je vijećnike upoznao sa radom upravnog odbora u izvještajnom periodu.

Vijećnik Buljetović Ćamil istakao je da postojeći UO je nelegalan te da je eliminisan kandidat iz reda uposlenika koj je apilirao iz reda uposlenika bez valjanog razloga. Općinsko vijeće nije upoznato sa donešenom sistematizacijom radnih mjesta te smatra da vijeće nije nadležno ni kod utvrđivanja viška i zbrinjavanja viška uposlenika.

Vijećnik Bajrić Fetah smatra da je nedopustivo da se za rad centra više sredstava izdvaja za rad uposlenika nego za same korisnike zbog kojih centar i postoji. Smatra da je prevelik broj uposlenika te treba isti dovesti na broj koji odgovara potrebama centra.

Vijećnik Kadrić Memsud postavio je pitanje, da li je došlo do povećanja lica kojima je potrebna socijalna pomoć, te da li se razmišlja o upošljavanju logopeda za potrebe korisnika.

Direktor centra pojasnio je da ova ustanova ima širok dijapazon djelovanja te da se rad centra ne može pratiti prema dodjeli novčanih pomoći. Pored redovnih aktivnosti ovaj centar je realizovao niz projekata koji poboljšavaju položaj socijalno ugroženih lica. Potreba za logopedom postoji, te će se u saradnji sa ustanovom za predškolsko obrazovanje i vaspitanje uposliti logoped za potrebe korisnika sa područja općine Breza.

Vijećnik Buljetović Ćamil istakao je da Centar za socijalni rad Breza ima jako loše uslove za rad, te pita da li se radi na poboljšanju osnovnih uslova i kako Općinsko vijeće može pomoći u rješavanju tog problema.

Direktor centra pojasnio je da su uslovi stvarno teški i ne ispunjavaju propisane standarde za rad pogotovu što je smješten na prvom spratu zgrade, te je invalidnim licima onemogućen pristup. Radi se na tome da se za potrebe centra obezbijedi prostorija u prizemlju za potrebe rada dežurnih lica centra te za smještaj arhive što su osnovni uslovi za rad.

Vijećnik Bajrić Fetah smatra da je struktura zaposlenih u ovoj ustanovi loša, te da rade lica koja nisu potrebna za normalno funkcionisanje centra, nasuprot tome nedostaje stručni kadar.

Predsjednik kluba SDA Mirza Ahmedspahić u ime kluba vijećnika SDA, istakao je da ovaj klub neće podržati ovaj izvještaj zbog nepravilnosti koje su rađene u mandatu bivšeg direktora, i podržavaju rad novoimenovanog direktora.

Vijećnik Suljagić Mirzet istakao je, da stranka za BiH podržava ovaj izvještaj, te predlaže da se pokrenu inicijative za izgradnju zgrade za potrebe Centra za socijalni rad Breza.

Predsjednik kluba SBB također podržava ovaj izvještaj.

Učesnika u raspravi više nije bilo te je nakon glasanja konstatovano da je Izvještaj o radu Javnih ustanova sa finansijskim izvještajem za 2017.godinu i izvještaja o radu Upravnih

odbora javnih ustanova JU „Centar za socijalni rad“ Breza, usvojen sa 11 glasova ZA i 8 suzdržanih glasova.

b) JU Za predškolsko obrazovanje i vaspitanje „Umihana Čuvidina“ Breza

Direktorica JU Za predškolsko obrazovanje i vaspitanje „Umihana Čuvidina“ Breza Amra Mušić istakla je, da je pripremljen izvještaj koji prikazuje sve aktivnosti ove ustanove, ukoliko ima nejasnoća stoji na raspolaganju vijećnicima. Predsjednik UO ustanove Kovačević Melisa također je upoznala vijećnike sa radom Odbora.

Vijećnik Buljetović Ćamil postavio je pitanje, da li su izmirene obaveze prema radnicima koji su otišli u penziju.

Vijećnika Kadrić Memsud interesovalo je, da li je ustanova izmirila obaveze prema Komunalnom preduzeću, te je tražio pojašnjenje finansijskih tokova.

Vijećnik Bajrić Fetah smatra da ima višak uposlenih radnika prema broju djece te je iznio podatak o broju uposlenih lica u susjednim obdaništima i njihovom organizacijom. Smatra da se treba obratiti pažnja i prema drugoj djeci koja po zakonu trebaju provesti određen dio sati u ustanovi prije polaska u školu.

Direktorica centra pojasnila je da broj zaposlenih odgovara pedagoškim standardima koji se moraju poštovati prvenstveno radi sigurnosti djece . Istakala je da je za 147 djece obezbijeđeno predškolsko obrazovanje propisano zakonom i da ova kategorija djece nije zanemarena.

Vijećnik Sirotanović Arif uputio je pohvale za rad ovog centra.

Predsjednik kluba SDA Mirza Ahmedspahić istakao je da ovaj klub neće podržati ovaj izvještaj te da će ostati suzdržani zbog nezakonitog rada bivše uprave.

Učesnika u raspravi više nije bilo te je nakon glasanja konstatovano da je Izvještaj o radu Javne ustanove sa finansijskim izvještajem za 2017.godinu i Izvještaj o radu Upravnog odbora, JU Za predškolsko obrazovanje i vaspitanje „Umihana Čuvidina“ Breza usvojen sa 14 glasova ZA i 5 suzdržanih glasova.

c) JU Opća biblioteka „Muhamed Kantardžić“ Breza

Direktor JU Opće bilbliteke Muhamed Kantradžić Breza Indira Lukačević upoznala je vijećnike o radu ustanove u 2017. godini, a vijeću se obratio i predsjednik UO Šabić Munib.

Vijećnik Kadrić Memsud postavio je pitanje koje se odnosi na dugovanje za komunalne usluge , da li su izmirene.

Direktorica je pojasnila da postoji dug od 10.000 KM za grijanje objekta , te smatra da će uz pomoć osnivača ovaj dug biti izmiren.

Učesnika u raspravi više nije bilo te je nakon glasanja konstatovano da je Izvještaj o radu Javne ustanove sa finansijskim izvještajem za 2017.godinu i Izvještaj o radu Upravnog odbora, JU Opća biblioteka Muhamed Kantardžić Breza za 2017. godinu svojen jednoglasno sa 18 glasova ZA. ( U trenutku glasanja u sali nije bio prisutan vijećnik Salčinović Fikret).

a) JU Dom zdravlja Breza

Direktor JU Dom zdravlja Breza upoznao je vijećnike o organizaciji zdravstvene zaštite na području FBiH, koja je jako složena imajući u vidu činjenicu da se Federacija BiH sastoji od 10 kantona i svaki kanton zasebno po zakonu uređuje zdravstvenu zaštitu. Posebno je napomenuo da se moraju ispoštovati standardi i normativi koji su propisani u tzv.

Plavoj knjizi. Zdravstvena zaštita organizovana je kao primarna i specijalističko konsultativna zdravstvena zaštita koju provode timovi porodične medicine.

Zatim je detaljno vijećnike upoznao o radu u Domu zdravlja Breza, koji ima 6 timova porodične medicine i 1 mobilni tim. Trenutno se radi na uvođenju elektronskih recepata koji će omogućiti brži i lakši rad kako uposlenicima tako i pacijentima. Upoznao je vijećnike da se Dom zdravlja susreće sa nizom problema, između ostalog veliki problem predstavlja nedostatak savremene opreme za obavljanje specijalističkih pregleda, za koje Ustanova ima osposobljen kadar, ali nemaju uslove za rad. Problem predstavlja i nedostatak vozila za prevoz pacijenata na dijalizu, te je u vezi toga upućen apel za pomoć Premijeru Federacije da se obezbijedi nabavka vozila, obzirom da je Federalni nivo zadužen za ovu oblast. Zabrinjavajući podatak je da je broj rođene djece 97 a umrlih osoba 191. Napomenuo je da je za svaku pohvalu broj vakcinisane djece u odnosu na okruženje. Odjel za zaštitu žena i trudnica također pokazuje dobre rezultate u radu.

Vijećnik Kadrić Memsud istakao je da ova tematika zaslužuje organizovanje tematske sjednice, obzirom na složenost i stanje u zdravstvenoj zaštiti. Uvođenje elektronskih recepata je za svaku pohvalu, ali ne funkcioniše zbog neusaglašenosti lijekova koje doktori propisuju i koji se nalaze u apotekama, te stvaraju se problemi pacijentima, koji se moraju ponovo vraćati u Dom zdravlja. Postavio je pitanje da li Dom zdravlja ima specijalizanata koji su od Ustanove upućeni na specijalizaciju. Traži da se riješi plaćanje troškova prevoza pacijenata obzirom da su pacijenti u ovom pitanju oštećeni i moraju plaćati prevoz, iako po zakonu imaju pravo na naplatu troškova.

Vijećnik Bajrić Fetah istakao je da direktor Ustanove treba regulisati stanje u Domu zdravlja u pogledu uposlenog osoblja, obzirom da ima uposlenih koji se ponašaju na neadekvatan način. Također je iznio problem validnosti imenovanja Upravnog odbora i samog direktora Ustanove. Smatra da se, ukoliko je potrebno, nabavka ampularnih lijekova finansira iz Budžeta općine Breza, obzirom na loše finansijsko stanje pacijenata. Kad su u pitanju specijalistički pregledi, treba obezbijediti prisustvo ljekara specijalista onoliko koliko je potrebno a ne zadovoljiti se sa normativima koji su propisani iako su isti na štetu pacijenata, i ako je potrebno obezbijediti dodatna novčana sredstva kako bi se naplatili, a sve u cilju da pacijenti ne moraju čekati na preglede duži vremenski period. Na kraju je dodao da neće glasati za usvajanje ovog izvještaja.

Direktor Doma zdravlja pojasnio je da Dom zdravlja ne može uticati na propisanu listu lijekova obzirom da Ministar koji dođe na vlast donosi esencijalnu listu lijekova te ponekad dođe do neusaglašenosti propisanih i nabavljenih lijekova u apotekama. Trenutno iz Općine Breza na specijalizaciji se nalaze tri doktora koji se nažalost samofinansiraju što ne garantuje da će isti ostati da rade u ovoj ustanovi.

Predsjedavajući općinskog vijeća Vedad Jusić, je u svoje ime pitao direktora Doma zdravlja o visini ličnog dohotka. Gdje su utrošena sredstva u iznosu od 25.000KM koja su iz Budžeta općine Breza prebačeni u 2017. godini.

Direktor DZ Breza je odgovorio, zbog zaštite podataka ne može podijeliti tu informaciju a da su sredstva od 25.000KM utrošena na isplatu regresa.

U ime kluba SDA Bašić Mirnes je istakao da neće podržati izvještaj o radu Doma zdravlja Breza.

Vijećnik Sirotanović Arif istakao je da je on više godina predlagao finansiranje specijalizacija za doktore iz Doma zdravlja kako ne bi ostali bez stručnog kadra. Predlaže pokretanje inicijative o plaćanju specijalizacije kako bi pomogli Domu zdravlja. Traži da se

pokrenu aktivnosti da se doprinosi za penziona i zdravstveno osiguranje mora plaćati bez obzira o kome se radi, što bi popravilo finansijsko stanje Općine Breza. Također traži da se ponovo pokrenu aktivnosti za plaćanje troškova prevoza pacijenata. Na kraju izlaganja istakao je da će BPS podržati Izvještaj. Apeluje da se pokrenu aktivnosti da se obezbijede sredstva za nabavku specijalističke opreme čije učešće će uzeti privredni subjekti sa područja Općine kao i drugi donatori.

Učesnika u raspravi više nije bilo pa je predsjedavajući općinskog vijeća dao na glasanje Izvještaj o radu Javne ustanove Dom zdravlja Breza sa finansijskim izvještajem za 2017.godinu i izvještaj o radu Upravnog odbora javne ustanove, te je nakon provedenog postupka glasanja konstatovano da izvještaj nije usvojen ( 10 glasova ZA, 7 suzdržanih i 2 vijećnika su izuzeta od glasanja. Vijećnik Fikret Salčinović i Midhat Beširević zbog sukoba interesa).

Potom je uslijedila pauza od 20:00h – 20:15h

### **Ad.8**

Razmatranje Informacije o realizaciji projekta Proširenja sistema vodosnabdijevanja naselja „Bukovik“.

Pomoćnik načelnika Salih Hasanspahić je upoznao vijećnike o hronologiji proširenja sistema javnog vodosnabdijevanja za naselje „Bukovik“, te ističe kako je najbitnije da se projekat privede kraju.

Vijećnik Buljetović Ćamil istakao je da je osnovno pitanje koje se postavlja, pitanje odgovornosti. Vjeruje je izvođač sam sebi uplatio sav novac. Zanimaju ga službe i ko je prebacivao sredstva. Smatra da će se isto desiti i sa vodovodom Slivno. Apsurdno je da se 5 godina radi vodovod.

Vijećnik Bajrić Fetah smatra da je istina sve što je vijećnik Buljetović Ćamil rekao i u cjelosti ga podržava. Želi dobiti povratnu informaciju koliko će ovo izvođenje radova koštati pošto ovo nije jedinstven slučaj, isti slučaj je i sa vodovodom Dadijevac. Smatra da je odgovornost na službama koje ne rade svoj posao.

Vijećnik Kadrić Memsud istakao je da je svaki načelnik pravio greške što se tiče filterskog postrojenja i da je ovo propala investicija i da treba svaki pojedinac i svaki vijećnik uzeti učešća u rješavanju ovog problema.

Vijećnik Bajrić Fetah smatra da vijećnik Kadrić Memsud sad zastupa to mišljenje a sam je glasao za u prijašnjem sazivu za to isto filtersko postrojenje.

Vijećnik Kadrić Memsud je uputio repliku, da je govorio opšte stvari, i da u Brezi ništa nije kako treba. Manje je važno ko su tada bili vijećnici i ko na vlasti, ono što je bitno jeste, da građani najmanje dobiju od tih uložениh sredstava.

Vijećnik Sirotanović Arif istakao da je do sada potrošeno 2,5 miliona KM na filterska postrojenja, za taj novac se mogla kompletna voda dovesti. Ne opravdava ničije postupke, smatra da svako treba odgovarati za svoja djela, bitno je samo da se nešto poduzme po ovom pitanju.

Vijećnik Suljagić Mirzet istakao je da je Služba pripremila šta treba uraditi, i da bi trebalo Zaključkom ovlastiti načelnika da potpiše Anex ugovora i da se da saglasnost za 19.000KM

Učesnika u raspravi više nije bilo, te je predsjedavajući općinskog vijeća pozvao vijećnike da učestvuju u davanju prijedloga Zaključka.



Vijećnik Suljagić Mirzet predložio je da se ovlasti načelnik da potpiše Anex ugovora kako bi se radovi mogli nastaviti.

Predsjedavajući općinskog vijeća, Jusić Vedad istakao je da će se uzeti u obzir prijedlog Zaključka vijećnika Suljagić Mirzeta, iako nije siguran koliko je vijeće zaduženo za rješavanje ove problematike obzirom da nije bilo obaviješteno, te da on lično neće podržati ovaj prijedlog Zaključka.

Vijećnik Buljetović Ćamil postavio je pitanje da li općinske Službe raspolažu informacijom koliko novi projekat zahtijeva sredstava da bi se završio?

Pomoćnik općinskog načelnika Hasanspahić Salih pojasnio je da je iznos oko 153.000KM i da se pojavio problem sa jednim dijelom koji je projektant uradio. Kada se taj problem pojavio angažovana je stručna Kuća koja je uradila novu projektnu dokumentaciju. Na terenu se nije moglo tačno stanje utvrditi, tek prilikom otvaranja rova utvrđeno je da su cijevi neadekvatne i da ne bi mogle izdržati pritisak, te je neophodno da se iste zamijene. Besmisleno je da projekat propadne radi nekih 20.000KM.

Vijećnik Bajrić Fetah naglasio je da je lično upozoravao na nepravilnosti prilikom izvođenja radova i da su svi znali da nije ispravno. Pita šta su radile nadležne službe i nadzorni odbor.

Učesnika u raspravi više nije bilo, te je nakon provedenog postupka glasanja sa 14 glasova ZA i 5 SUZDRŽANIH glasova usvojen sljedeći

## **ZAKLJUČAK**

**DAJE SE** podrška općinskom načelniku da potpiše Aneks sporazuma o zajedničkom učešću u realizaciji dodatnih radova na projektu „Proširenje gradskog vodovoda na naselje Bukovik“, Općina Breza iz programa utroška sredstava vodnih naknada za 2017. godinu, broj: 05-25-6376-6-1/17 od 04.09.2017. godine

### **Ad.9**

Prezentacija idejnog rješenja gradske tržnice.  
Informacija je primljena k znanju, koju je u ime firme „Bosnainženjering“ d.o.o. Sarajevo prezentovao gospodin Nedžad Varajić.

### **Ad.10**

Razmatranje i usvajanje prijedloga Rješenja o konačnom imenovanju članova Upravnog odbora JU Dom zdravlja Breza.

Predsjedavajući općinskog vijeća Jusić Vedad naglasio je da vijećnik Fikret Salčinović ne može glasati u ovom slučaju zbog sukoba interesa.

Općinski načelnik Munib Zaimović predložio je da se raspiše Konkurs, ali skreće pažnju da se Upravni Odbor mora što prije izabrati kako ne bi došlo do blokade.

Vijećnik Salčinović Fikret istakao je kako ne vidi valjani razlog zašto Upravni odbor ne bi imao dovoljno glasova na ovom vijeću. Napominje, da će doći do blokade ako se ne dobije dovoljan broj glasova.

Vijećnik Ćamil Buljetović istakao je da DF i SDP neće učestvovati u raspravi i da će se suzdržati od glasanja.

Vijećnik Sirotanović Arif predložio je da se zakaže tematska sjednica za 5 do 7 dana.

Ispred stručne službe općinskog vijeća, Safet Zahirović je pojasnio da je zakon o sukobu interesa jasan. Što se tiče segmenta odgovornosti izabranih zvaničnika, treba se izuzeti iz glasanja vijećnik Beširević Midhat. Vijećnik Salčinović Fikret svojim glasanjem bi došao samo u sukob grižnje savjesti jer nema finansijskog interesa, izabrani zvaničnici lično su odgovorni za svoje djelovanje u vršenju javnih funkcija na koje su izabrani.

Predsjedavajući općinskog vijeća zatražio je poimenično glasanje u ovom slučaju. Nakon provedenog postupka glasanja, konstatovano je da je prijedlog Rješenja o konačnom imenovanju članova Upravnog odbora JU Dom zdravlja Breza u sljedećem sastavu

1. Meliha Beširević, predsjednik, predstavnik Osnivača
2. Dr. Midhat Beširević, član, predstavnik stručnih radnika Ustanove
3. Dr. Lejla Smailbegović-Čolan, član, predstavnik Ministarstva zdravstva ZDK usvojen sa 11 glasova ZA, 7 SUDRŽANIH i bez glasova PROTIV.

#### **Ad.11**

Imenovanje radne grupe po Zaključku Općinskog vijeća („Sl. glasnik Općine Breza broj 06/18“).

Predsjedavajući općinskog vijeća upoznao je vijećnike da je prijedlog radne grupe bio na kolegiju. Prijedlog kolegija je bio, da radnu grupu čine 4 pomoćnika općinskog načelnika, generalni direktor Komunalnog, izvršni direktor Komunalnog i 8 predsjednika MZ koje su predviđene kao lokacije za reciklažno dvorište.

U radnu grupu imenuju se:

1. Salih Hasanspahić pomoćnik Općinskog načelnika,
2. Meliha Beširević pomoćnik Općinskog načelnika,,
3. Smajila Omerhodić pomoćnik Općinskog načelnika,
4. Herco Huso, pomoćnik Općinskog načelnika,
5. Enver Hadžiahmetović, direktor JP „Komunalno“ d.o.o Breza,
6. Mujo Muratović -tehnički direktor JP „Komunalno“ d.o.o Breza,
7. Salkić Azrudin predsjednik MZ Izbod
8. Alić Salem predsjednik MZ Koritnik,
9. Dedić Omer predsjednik MZ Mahala,
10. Muratović Mensur predsjednik Podružnice Potkraj,
11. Hodžić Mahir predsjednik podružnice Kamenice,

Nakon provedenog postupka glasanja, konstatovano je da je ovaj prijedlog usvojen sa 17 glasova ZA i 2 SUZDRŽANA glasa.

#### **Ad.12**

Upoznavanje sa dopisima upućenih Općinskom vijeću odstrane uposlenika Bretexa.

Predsjedavajući općinskog vijeća upoznao je vijećnike da su u posjeti predstavnici bivših radnika Bretexa, kao i predstavnici boračkih organizacija, te traži od njih da upoznaju vijeće sa svojom problematikom.

Botić Edhem upoznao je vijećnike sa trenutnim stanjem bivših radnika Bretexa, te činjenicom da su razgovarali i sa načelnikom općine Breza te da imaju njegovu saglasnost što se tiče pokretanje inicijative prema Vladi ZDK u vezi dobivanja penzije.

**Predsjedavajući općinskog vijeća je dao na glasanje sljedeći Zaključak:**

**DAJE SE** podrška općinskom načelniku da nastavi aktivnosti na rješavanju statuta radnika firme „Bretex“ Breza u okviru zakonom propisanih uslova, koji je usvojen jednoglasno sa 19 glasova ZA.

Predstavnik boračkih organizacija također je upoznao vijeće sa njihovom problematikom, te je dogovoreno da će Stav po problematici zauzeti na sastanku predsjednika klubova parlamentarnih stranaka.

Ovim je iscrpljen dnevni red dvadesete redovne sjednice Općinskog vijeća Breza, koja je sa radom završila u 21:50 sati.

*Sastavni dio ovog zapisnika čini i tonski zapis sjednice.*

ZAPISNIK SAČINILA  
Zakira Smailbegović

PREDSJEDAVAJUĆI  
Općinskog vijeća  
Jusić Vedad